



Publicaziuns officialas dils 12-10-2018

Damondas da baghegiar

Nr. 83/2018

Datum da publicaziun: 12-10-2018
Patrun: Deplazes Gieri e Braun Beda, 8105 Regensdorf
Liug e parcella: Catat; 128
Object: seiv da schurmetg e seiv viva encunter via da quartier

Nr. 99/2018

Datum da publicaziun: 12-10-2018
Patrun: Deplazes Roman e Brigitta, 7176 Cumpadials
Representant: Swisshaus AG, 5600 Lenzburg
Liug e parcella: Camon; 4091
Object: construcziun d'ina casa d'ina famiglia

Ils profils ein tschentai ed ils plans da construcziun ein deponi tier la canzlia communal.
L'investa publica cuozza 20 dis dapi il datum da publicaziun.

Eventualas protestas encunter sura damonda da baghegiar ein d'inoltrar alla cumissiun da baghegiar Sumvitg enteifer 20 dis dapi il datum da publicaziun.

Sumvitg, 12-10-2018

Cumissiun da baghegiar

Curdem da gronda dimensiun

La vischnaunca organisescha ina rimnada da rufid bloccont sco suonda:

Venderdis, ils 19 d'october 2018 dallas 08.00 - 18.00 uras

Ei vegn rimnau il rufid per l'entira vischnaunca sin la piazza Igniu (spel baghetg economic)

Ils curdems ein da deponer els containers ni navettas tschentai sil plaz. Per tener-casa vegn priu encunter **max. 2 m³** rumians. Quantitads pli grondas, per ex. ord rumidas da casas e clavaus ein da transportar directamein e sin cuost dil caschunader ella deponia regionala a Rueun. Rumians jamnils, q.v.d. rumians ch'ins dismetta el sac verd e rufid bloccont pign (dimensiuns max. 100 cm liung / 60 cm lad / 60 cm ault / peisa max. 30 kg) vegnan buca pri encunter. Tals rumians ein da plazzar als plazs da rimnada usitai els vitgs e che vegnan rimnai entras la Regiun Surselva mintgamai la mesjamna.

Ei vegn acceptau

- maschinas pintgas e mopeds mo cun tratg giu ieli e benzin,
- ferramenta, ferradira da tuttas sorts (meisas da fier, uaffens da fier, velos, e.a.v.),
- tut las maschinas electronicas (computers, frestgeras, maschinas da furar, pegnas d'electriche cun e senza ieli e.a.v.),
- mobilier movibel (letg, scaffa, suppia, madrazza, teppi denton buca culau giu, e.a.v.),
- requisits per il temps liber e sport (skis, indrez da trenament, velos e.a.v.) ch'ei pli gronds che 100 cm liung / 60 cm lad / 60 cm ault ni pli grevs che 30 kg,
- per pneus senza gavegl vegn incassau ina taxa da frs. 5.--, cun gavegl frs. 10.--,
- per pneus da maschinas agricolas pintgas vegn incassau ina taxa da frs. 20.-- e per pneus da tracturs frs. 50.--,

- calzera da skis san vegnir dai giu en favur dalla ARGO Tavau per frs. 5.--.

Buca acceptau vegnan

- tuttas maschinas agricolas,
- lenna da brisch, lenna veglia, lenna da baghetg (tabliaus, plantschius, lattas, quaders, panos, e.a.v.),
- sacs da pupi e da plastic,
- materials da pachetar (palets, stiropor, plastic, e.a.v.),
- requisits per il temps liber e sport ch'ei n pli pigns che 100 cm liung / 60 cm lad / 60 cm ault e pli levs che 30 kg (bob, scarsola, calzera da rodas, aissa-rulletta e.a.v.),
- blachas da ballas da silo (verdas ed alvas),
- curdems da baghetg (linoleums, izolaziuns, plastics, folias da tetg e da preits, e.a.v.) e curdems da fatschentas,
- curdem verd da curtin e caglias, tals curdems san vegnir transportai sin la deponia verda ad Igniu,
- cartun e pupi duei vegnir surdau alla rimnada entras la scolas resp. las uniuns.

Ils suandonts rumians vegnan rimnai cun ils rumians jamnils e basegnan las marcas sco suonda:

- sacs tochen 50 kg; 1 marca da frs. 2.50,
- rumians pigns tochen 100 cm liung / 60 cm lad / 60 cm ault e pli levs che 12 kg; 2 marcas da frs. 2.50,
- rumians pigns tochen 100 cm liung / 60 cm lad / 60 cm ault entochen ina peisa da 30 kg; 3 marcas da frs. 2.50.

Nus appelein alla responsabladad da vischinas e vischins e supplichein da setener vid quellas directivas en favur digl ambient. Medemamein fagein nus attents da buca deponer rumians sin deponias illegalas (selvadias). Talas deponias cunterfan alla legislaziun per la dismessa da rumians e vegnan annunziadas als organs responsabels e puni.

Per ulteriuras informaziuns stat il gerau responsabel bugen a Vossa disposiziun.

Sumvitg, 12-10-2018

Departament d'ambient

Preparaziun sin temps d'unviern

Tenor art. 69 dalla lescha da baghegiar ei la vischnaunca autorisada da schar dismetter la neiv dils implonts publics d'avertura sil schischom privat cunfinont cun prender il duiv risguard sin baghetgs, implonts e cultiras. Per liung dallas vias publicas e privatas ein seivs demontablas ni implonts da tal gener d'allontanar. Ultra da quei ston caglias e roma vegnir tagliadas anavos aschia che la rumida da neiv vegn buca impedida.

Quellas lavurs da preparaziun sil temps d'unviern ston vegnir exequidas entochen alla fin d'october 2018. En cass d'omissiun refusescha la vischnaunca suenter la sesiun d'unviern scadins donn occuri ord la rumida da neiv.

Sumvitg, 12-10-2018

Departament traffic

Rumida da neiv 2018/2019

La vischnaunca exequescha era uonn puspei sin incarica la rumida da neiv per privats. L'indemnisaziun per quella lavur corrispunda allas cundiziuns che l'industria privata pretenda. Plinavon sto quella dismessa da neiv star anavos en prioritad alla rumida dils implonts publics d'avertura. Sche pusseivel duei l'incarica vegnir surdada alla vischnaunca mo leu nua che quella procura era la dismessa dallas vias cunfinontas. Vischinas e vischins che vulan schar exequir la vischnaunca la rumida da neiv da lur vias e parcadis privats duront gl'unviern proxim ein supplicai d'annunziar quei a scret ni per telefon entochen ils **31 d'october 2018** al cau dil menaschi stradal (tel. 079 638 18 19).

Sumvitg, 12-10-2018

Departament traffic

Rimnada da pupi e cartun

Venderdis, ils 26-10-2018

All'entschatta ina supplica: Per simplificar in tec nossa lavur fussen nus fetg engrazieivels, sch'il pupi savess vegnir ligiaus aschia ch'ils pachets dattan buca dapart. Tier il cartun vala il medem. Fagei aschi bien e ligei era cheu ensemen quel tier pachets. Quei fuss in grond levgiament per nus che rimnein il pupi e cartun. Per mintgin/a da Vus ina pintga causa e per nus in enorm avantatg. Sche zatgi vul menar sez siu pupi e cartun tier las muldas, lu sesanflan quellas a Rabius, Cumpadials, Sumvitg ed a Surrein.

Rimnada:

avonmiezdi: Rabius, Sumvitg, Cumpadials, S. Benedetg e Clavadi

suentermiezdi: Surrein

Grond engraziament per Vossa capientscha e bunaveglia.

Scolaras e scolars cun las personas d'instrucziun dil consorzi da scola Sumvitg-Trun

Horror night Cumpadials

A caschun dalla Horror night arvin nus la bar gia venderdis, ils 12 d'october naven dallas 19.00 pils convischins ed amitgs da Cumpadials e da nossa vischnaunca. Nus selegrein sin Vossa viseta! *Uniun da cultura e sport Cumpadials*

Uniun da catschadurs Greina, Sumvitg

Invitaziun alla tgira d'atun

Nus serimnein sonda, ils 20 d'october 2018 sil parcadi a Miralv.

Temps da lavur: 7.30–13.00,

plazza da lavur: Ruosna da Bos.

Uaffens: vons, resgia da cadeina, capellina e caultschas da resgiar da segirtad.

Eventual sclariment dat nies cau da tgira Corsin Giger, tel. 078 736 97 90, ni sut www.catschadurs-greina.ch.

Cun amicabels salids e sin seveser!

Per la suprastonza, il cau da tgira, Corsin Giger

Sera da divertiment

Cun Viktor Giacobbo e Martin Candinas

Venderdis, **ils 12 d'october 2018**, allas 20.15 ella sala dil «Hotel Greina» a Rabius.

Moderaziun: Valentin Schmed

Entrada: Collecta en favur dalla sanaziun dalla piazza da giug a Rabius-Igriu

Organisaziun: Cummissiun da cultura Sumvitg

Menu dalla tatta:

cun spisas tradiziunalas / mit althergebrachten Gerichten:

Sonda, ils 13 d'october 2018

Ustria Val, Val Sumvitg

Sonda, ils 27 d'october 2018

Hotel Greina, Rabius

Reservaziuns directamein ell'ustria giavischada.

Bien appetit giavischa, *Sumvitg Turissem*

Sera d'informaziun scola da talents Surselva

Mesjamna, ils **31 d'october 2018**, 19.30 ell'aula dalla casa da scola, Glion

Ulteriuras informaziuns mira vischnaunca Ilanz/Glion.

TalentSchule.Surselva Infoabend

Mittwoch, **31. Oktober 2018**, 19.30 Uhr im Schulhaus Ilanz, Aula

Weitere Informationen siehe Gemeinde Ilanz/Glion.